

## Rau To Jud Imbooda Jut—Jude

<sup>1</sup> You Jud\*

mbesoonja to Yesu Krisi ve Yakobus tazi. Nambood rau tonene ilat to yam tamtoghon to Tamaan Maaron lolo payam, ve ipoi gham anim le, ve aazne aneep ila Yesu Krisi nima. *Yo 17:11+; 1Pe 1:5*

<sup>2</sup> Maaron toit, ye lolo isamin gham ve ipul sosor tiam, ve ighur luuma toni iza tiam, ve lolo payam kat. You naghaze poia toni izaza tiam tovene, le ivot inim tiina kat.

*Jud iveivei pa lupuunj to Krisi ighaze tipatum di pa ndiran kaaromja to tineep ila lolodi*

<sup>3</sup> Yam ndiran tiou, lolog payam kat. Lolog ipamundigin ghou naghaze le nambood saveen payam pa uraat to Maaron to igham mulin ghiit ve ilup ghiit tanim ee moghon. Eemoghon naghita naghaze you irau nambood saveen to ipalot gham, leso aparab ariana pa saveen to Krisi to iit taghur ila ne. Saveen tonene, Maaron ighuri ila iit tamtoghon toni patabuanja nimaad pataghaan wa, ve ye ighaze tanjin poiani. *Pil 1:27; 1Tim 6:12*

<sup>4</sup> You nasaav payam pasa, ndiran kaaromja pida to titaghon ataam to Maaron maau, tilat ve tiyoon ila lolomim. Tiina toit Yesu Krisi to ingin

---

\* **1:1:** Ngara pida tighaze ngeu to imbood rau tonene, ye Yesu tazi. Ughita Mt 13:55 ve Mk 6:3. Saveen waaro ru tonowen tisavia Yesu nditazi. Todi eez, iza Yudas.

ghiit, yes tighur muridi pani wa. Ve tighamun saveeᅇ pa poia to Maaron. Pasa, tisavsaav pa tamtoᅇhon tovene: Ighaze tala pa naghood moghon ve mataad samia tanimale ᅇᅇgavuun, nene mbeb sorok. Pasa, Maaron pale ireu sosor toit. Saveeᅇ kaarom todi tonowen inim pughu pa tamtoᅇhon tigham ᅇᅇgar samsamia naol. Tovenen muri, Maaron pale iᅇᅇgabiiz di, ve ighur atia padi ve tilaledi. Saveeᅇᅇa, timbooda muuᅇ wa. *2Pe 2:1*

*Maaron ighurghur atia pa ndiran samsamiadi*

<sup>5</sup> Yam awatag: Muuᅇ, ᅇᅇgeu Tiina igham mulin ival tiina to Israel ve tipul Isip. Eemoghon muri, tamtoᅇhon todi pida tighur ila toni maau, ve tizoor aliᅇa. Tauto ye irab di tilaledi. Saveeᅇ tonene, paghu payam maau. Yam asob awatagi. Ve aazne napit saveeᅇᅇa muul, leso matamim kisini. *Nam 14:29+; 1Kor 10:5; Hib 3:17+*

<sup>6</sup> Ve agham ᅇᅇgar pa yes aᅇela to muuᅇ kat tizoor Maaron aliᅇa. Uraat to Maaron ighuri ila nimadi ve izadi pani, toman inadi to nepooᅇ to ye igham padi, yes tirere pani ve tipuli. Tauto Maaron izurun di tighau pa inadi, ve ikau di pa ravraav arianeadi to pale tineep irau sawa isob, ve ighur di tineep ila ndoroom tiina lolo. Leso tineep tonowe ve tisaᅇan sawa tiina to Mboᅇ Muri, ghoru ye iᅇᅇgabiiz di ve ighur atia padi. *2Pe 2:4; Syg 20:10*

<sup>7</sup> Ve Sodom ve Gomora toman ndug pida to tigharau di ne paam. Yes tipul taudi kat pa ᅇᅇgar samsamia to ulidi, ve matadi samia tinimale ᅇᅇgavuun. ᅇᅇgar to tighami, nene irau ᅇᅇgar eta maau. Pasa, nditamoot todi timomogheer pa nditadi nditamoot. Pataneani to Maaron ighuri padi, nene ipa-

toon ghiit pa sa atia to pale Maaron igham pa ndiran samsamiadi. Yab pale ighan di itaghoni taghoni gha ila. Irau isob maau. *Mbnp 19:1+; 2Pe 2:6+*

*Ndiran kaaromņa ngar todi*

<sup>8</sup> Ndiran kaaromņa to tineep ila lolomim, tovene paam. Ngar todi ingalaan ila Maaron mata maau. Pasa, tandagiin todi soroksorok igham ngar todi iwaghamgham. Tauto titaghon ngar samsamia naol to lolodi ipazaagh di pani, ve tizorzoor yes pooza to Maaron ighur di pa tinjin ghiit, ve tipiyaav saveen velegiin pa yes anjela to izadi ve tapiridi tintina. *2Pe 2:10+*

<sup>9</sup> Aghita. Anjela Mikael, ye daba to anjela tisob. Eemoghon sawa to yesuru Sadan tiwazoran di pa Mose paatu, ye ipakur tau ve isavia saveen samia eta pa Sadan inimale yanoonj ne maau. Isaav moghon tovene: “Ngeu Tiina tau pale iyaan ghom.” Pasa, ye iwatag: Uraat to gabizoon ve ghuruun atia, nene mbep to Maaron.† *Sek 3:2*

<sup>10</sup> Eemoghon ndiran kaaromņa tonanan tipakur taudi ve tipiyaav saveen velegiin pa mbep to taudi tikankan pan. Yes ledi ngar poia eta maau. Ngar todi inimale ngai sagsag. Sa ngar samia to lolodi ipazaagh di pani, nene tila pa naghodi moghon. Tauto tighamgham ngar to pale iwaghamun di ve tilaledi. *2Pe 2:12*

<sup>11</sup> Ndiran tonanan tikaria taudi wa! Pasa, ataam to saveen onoon, yes tipuli wa. Laghoon todi, yes titaghon ngar to Kain. Ve lolodi igham pa yaam,

---

† **1:9:** Kamos to mbep tonene ineep ila Saveen Munjina maau. Ineep ila rau mungina ite to yes Yuda.

tauto tipul taudi pa ngar samia, ve tiweu Maaron tamtoghon toni pa ghamuun soso, inimale muun Balam ighami. Ve tizoroor Maaron uraata toni, inimale muun Kora ighami. Tovenen muri, yes pale tilaledi tinimale Kora. *Mbnp 4:3+; Nam 16:1+, 22:1+; 2Pe 2:15*

<sup>12</sup> Sawa to yam alup gham pa ghanghaniin toman sunuun itaghon ataam to lolomim pa taudim, ndiran tonanan tigham lupuun tiam isami ila Maaron mata. Pasa, ledi roroniin eta pani maau, ve tigham ngar pa nditadi maau. Matadi ingal taudi moghon. Yes tinimale yaghur tae to taghita ve taghaze uman pale izi, eemoghon maau. Yaghur iviviira ila. Ve tinimale ai to sawa toni to anona ivot, eemoghon anona maau, ve imaat ve igorgor. Tovenen tamtoghon tikurubi toman waria, ve tipiyaava ilale. Yes tinimale tamtoghon to timaat pae ru. Pasa, ataam to matteen to muun titaghoni ve tipuli, tauto aazne tila titaghoni muul. *Mt 15:13; 1Kor 11:20+; 2Pe 2:13,17*

<sup>13</sup> Yes tinimale dibom to ipuul, ve mbeluut toman muun iza. Pasa, tipapazaagh tamtoghon pa ghamuun ngar samsamia naol to ighaze iit tagham di, nene pale mayaad. Eemoghon yes mayadi maau. Ve tinimale pitum to tiyel pa ataam todi. Ndiran tonanan, Maaron igharaat inadi pataghaan wa. Leso tineep tonowe ila ndoroom tiina lolo itaghoni taghoni gha ila.

<sup>14</sup> Iit tawatag: Adam natu, nene Set. Ve Set natu Enos, ve sinj todi tiparsengan di tovene ila ila le Enok ivot inim liim ve ru. Enok, ye propet eez to ivotia Maaron aliya. Saveen toni pida injarua

ndiran kaaromņa tonanan.†

Ighaze:

‘Aghita. Ngeu Tiina pale inim toman aņela toni patabuaņa ndiņndiņ ndiņndiņ, <sup>15</sup> leso iņgabiiz tamtoghon tisob ve ighur atia padi. Ve yes to matadi iņgal Maaron maau ve tiyel pa ataam toni, ye pale ighur atia padi pa ngar samsamia todi to naol ne, ve saveeņ samsamia tisob to tipiyaav di pani.’ *Mbnp 5:22+; 2Tes 1:7+; Syg 1:7*

<sup>16</sup> Ndiran kaaromņa tonanan, lolodi poia pa mbeb eta maau. Moghon moghon tiņoņooņ ve tiyouyou avodi pa tamtoghon. Ve titaghon ngar samsamia naol to lolodi ipazaagh di padi, ve timboboob ve tipapait taudi izadi. Ve tigham nğoreeņ pa tamtoghon, leso tigham lolodi ve titaghon di pa ngar todi. *2Pe 2:18*

### *Mataad kisin saveeņ to yes mbaņooņa*

<sup>17</sup> Yam ndiran tiou, lolog payam kat. Matamim iņgal saveeņ to muuņ mbaņooņa to Tiina toit Yesu Kriši tisavia pa ngar to muri pale ivot. <sup>18</sup> Yes tisaav payam tighaze: “Sawa to muri ighaze ivot, nene pale tamtoghon matadi iņgal Maaron maau, ve titaghon ngar samsamia naol to lolodi ipazaagh di pani, ve tiveleg Tiina toit.” *Mbaņ 20:29+; 2Tim 3:1; 2Pe 2:1, 3:2+*

<sup>19</sup> Tamtoghon tovene, tireureu lupuuņ to Kriši. Pasa, Maaron Avuvu ineep ila lolodi maau, ve titaghon ngar to taan moghon.

---

† **1:14:** Saveeņ tonene ineep ila Saveeņ Muņgina maau. Ineep ila rau muņgina ite to yes Yuda.

<sup>20</sup> Eemoghon yam ndiran tiou, ghurla tiam to Maaron igham payam, nene mbeb patabuan kat. Yam irau awapalotin gham, leso ghurla tiam ivot inim tiina ve iyaryaan kat. Ve agham tapirim ila to Maaron Avuvu ve asuñ itaghon pooz toni. *Ep 6:18; Kol 2:7; 1Tes 5:11*

<sup>21</sup> Maaron lolo pait kat, ve ighamgham poian ghiit. Tovenen yam paam, matamim kisin ngar toni tonowen ve ataghone irau sawa isob. Ve asaan sawa to Tiina toit Yesu Krisi lolo isamin gham ve igham mulin gham, ve igham gham aneep matamim iyaryaar le alok.

<sup>22</sup> Yes to ghurla todi iyaryaan sone ve lolodi ru, yam ayou avomim padi malep. Lolomim isamin di ve auul di. <sup>23</sup> Tamtoghon tiam pida tineep ila samia lolo wa. Tinimale alitliit to yab ighanghan ila. Tovenen rikia moghon ve apas di tivot pa ngar todi samia tonowen. Leso anim ataam pa Maaron igham mulin di. Ve tamtoghon pida, ngar samsamia to lolodi ipazaagh di pani, igham di tisami kat ila Maaron mata tinimale nonogiinça to timemeghazi. Tamtoghon tovene, lolomim isamin di ve auul di. Eemoghon apatum gham. Pa vene, tiyes gham pa ngar todi. Tovenen ala toman di pa ngar todi samia tonowen malep. Aneep sagan pa ngar todi tonowen ve aghur koi pani. *1Kor 3:15; Yems 5:19+*

### *Saveeñ palotiin*

<sup>24-25</sup> Maaron to Volaançã toit, ye moghon to Maaron tau. Ye irau ipalot gham, leso atap sob, ve ayoon ariança. Ve ye irau igham gham ala aneep tomani ila nguruba lolo toman lolomim poia kat.

Pasa, uraat to Krisi igham gham aneep denjamim ila Maaron mata, ve lemim sosor eta muul maau. Ye ariana ve iza tiina kat pa tapiri ve poia toni. Ve mbeb tisob tineep ila samba. Muun kat, sawa to mbeb eta ivot sone, ye ineeep tovene. Ve aazne ve muri paam, ye pale ineeep tovene, itaghoni taghoni gha ila. Tovenen iit tapaiti ila Tiina toit Yesu Krisi iza. Onoon. *Mbo 37:24; Ro 16:25+; 1Kor 1:8; Ep 3:20; 1Pe 5:10+; 2Pe 3:14,18*

**Maaron Saveen Toni Patabuan**  
**The New Testament and portions of the Old Testament**  
**in the Oov Dialect of the Saveeng language of Papua**  
**New Guinea. The Saveeng language is also called Mutu**  
**or Mutu-Tuam.**

**Sampela hap Buk Baibel long tokples Saveeng Oov**  
**long Niugini**

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 11 Nov 2022 from source files dated 9 Oct 2020

c7a45d99-91a2-564f-9c55-d2efc8be7fae